

Date – 31/10/2025

Time - 18:30 Hrs

HEADLINES (EVENING)

1. India ram inpumkhatna ni (Rashtriya Ekta Diwas) vawiin khan district hrang hranga sawrkar pisa-ah ram inpumkhatna puala thutiam sawi rual a ni.
2. Mizoram State Anti-Tobacco Day vawi 12-na pualin, ‘zuk leh hmuam tel lo nundan changkang’ tih thupui hmangin Tobacco-free Youth Campaign 3.0 vawiin khan Health Minister Pi Lalrinpuui a hawng.
3. Prime Minister Narendra Modia hoin vawiin khan Gujarat-a Ekta nagar-ah National Unity Day hman a ni
4. Union Home Minister Amit Shah-a chuan rammin zalenna a neih hnuah ram inzawmkhawmna turin Sardar Patela'n hna ropui tak a thawk a ti

<><><>

UNITY RUN

India ram inpumkhatna ni (Rashtriya Ekta Diwas/National Unity Day) chu vawiin hian rampumah hman a ni a, kumin hi Sardar Vallabhbhai Patel pianchampha vawi 150-na a nih bawk avangin sawrkar laipui thuchhuak angin uar takla hman a ni.

Mizoramah chuan district hrang hranga sawrkar pisa-ah National Unity Day puala thutiam sawi rualna neih a ni a. Hlemhletna laka fihlim tur leh India ram inpumkhatna chawi nung turin thutiam chham rual a ni.

Akashvani Aizawl, Tuikhuahtlang Station ah pawh Director & Cluster Head Pu DR Lalropuia kaihhruaiin Unity Dap pual thuchham rual a ni.

National Unity Day (Rashtriya Ekta Diwas) pual hian tukin dar 6 leh min 15 khan Aizawlah Unity Run neih a ni a, tum ber chu mipuite hnena inpumkhatna leh taksa sawizawi chawilar a ni a tih SAI Director Pu Lianminthang chuan a sawi.

Akashvani News Aizawl zawhna chhangin, Sports Authority of India (SAI) Director Pu Lianminthang chuan Aizawl bakah hian Lunglei leh Thenzawlah te tukin khan insawizawiin an tlan tih a sawi a, mi 400 vel an kal a ni a ti.

SAI Director chuan he Unity Day Run hi Fit India Run hmalakna kalzel a ni tel bawk tih sawiin, a tum ber chu mipuite hnena inpumkhatna leh taksa hrisel nei tura insawizawi chawilar a ni a ti a, India inpumkhat chu a pawimawh hle tih sawiin, state leh ram te a chak dawn a ti a, fitness run a nih bawk avangin taksa hriselna atan a pawimawh a, mipuite chu an nitin nunah taksa sawizawi leh tlan te uar a, thil chin than a nei turin a chah a ni.

Sardar Vallabhbhai Patel pian champha kum 150-na puala Mera Yuva Bharat (MY Bharat) hnuai India ram inpumkhatna atana beihpui thlak tur, "Sardar @150 Unity Campaign" hnuai hma lakna tur hrang hrang chu Lunglei leh Lawngtlaiah DC aiawh ten vawiin khan an puangzar a, Lawngtlai Additional DC Pu David Lalrinawma chuan, Nehru Yuva Kendra ti a hriat thin chu, Mera Yuva Bharat ti a thlak a ni a, a thiltum chu NYK nen a danglamlo tih sawiin, tuntuma hmalakna tur Sardar @ 150 ah pawh Thalaite inpumkhatna tur lam hawi chu ngaihpaawimawh a ni dawn a ti.

<><><>

EDUCATION MINISTER

School Education Minister Dr. Vanlalhlana hovin vawiin khan Govt. Diakkawn High School-ah 'Meet Your Minister' programme hmangin zirlai naupangte nen an inkawm a,

Dr. Vanlalhlana chuan zirlaite fuihna thu sawiin, mi hlawhtlingte hlawhtlinna chauh en lova, an tumruhna leh an kalkawnga kawng hrehawm an zawh dan atanga inzir turin a chah. Hlawhchhamna chu hlawhtlinna kawnga kal tlang ngei ngei tur a nihzia sawiin, zirlaite chu an zinkawngah vawi tam tak an hlawhchham dawn a, chutiang hunachte chuan inzirna atana hmang chungin, Pathianin talent hran theuh a pek hmang tangiin beidawng lova bei fan fan turin a ti a ni.

He hunah hian Minister chuan zirlai naupangte hnen atangin zawhna hrang hrang a dawng a, inkawm hona hun tha tak an hmang a ni.

Hemi hma hian Minister hian Kolasib-ah District Institute of Education and Training (DIET) Hostel thar a hawng a. DIET zirlaite chu nakin lawka zirtirtu la ni tur an nih avangin zirtirtu hna zahawm tak thawk tura an inbuatsaih laiin rilru paukhauh leh inpekna tak tak an neih a pawimawh a ni, a ti. Zirtirtu te chu naupangte hmangaihna dik tak nei a, an hlimnaa hlimpui thei leh an tahnaah pawh tahpui thei tur khawpa inpekna thuk an neih a ngai a ni, a ti. Minister chuan zirtirtute chu hun vawn dik kawngah entawntlak ni tur te, an posting-na hmun apiangah lungawi taka thawk a, an hnathawhna hmun apiang tihhmasawn tuma tan la turin a chah bawk.

<><><>

TOBACCO YOUTH FREE CAMPAIGN

Mizoram State Anti-Tobacco Day vawi 12-na puala, ‘zuk leh hmuam tel lo nundan changkang’ tih thupui hmanga buatsaih Tobacco-free Youth Campaign 3.0 vawiin khan Health&Family Welfare Department Minister Pi Lalrinpuii a hawng

Hawwna inkhawmah MINECO a buatsaihah thusawiin Health Minister chuan, TFYC-in a tum ber chu Mizorama kuate leh zirna ina tam thei ang ber vaihlo leh a kaihhnawih awm lohna hmun siam tura hmalak a ni a ti a. Department zirchiannain a tarlan danin, ruihhlo ngawlvei tam ber chu zuk leh hmuam atanga bul tan an ni a, Middle School naupangte zingah pawh zuk leh hmuam leh damdawi tite hial pawh an awm tih Minister chuan a tarlang a ni.

Anti-Tobacco Day pualin vaihlo leh a kaihhnawih do kawngah chuan mahni zawn theuhva theihtawp chhuah zel turin kalkhawmte chu a chah nghal bawk a ni.

Vawiin inkhawmah hian Indian Society on Tobacco and Health, Mizoram Treasurer Pi Lalbiaksangi kaihhruiin kalkhawm ten TFYC puala thutiam chham rualna hun an hmang a ni.

Champhaiah [awh Mizoram State Anti-Tobacco Day vawi 12-na pualin Tobacco Free Youth Campaign 3.0 chu Champhai Bawrsap Pu Mohammad Aaquib an a hawng a.

Pu Mohammad Aaquib chuan zirlai kalkhawmte zuk leh hmuam laka fihlim hram turin a fuih a, India ramah Mizoram chu zuk leh hmuam ti hnem ber leh cancer vei tamna ber an nih thu sawiin he nihna thlak tur chuan zuk leh hmuam tih loh a ngai tih a sawi. Zuk leh hmuam lo ti tawh an awm a nih chuan bansan turin a fuih a, ti lo te chu ti chhin lo hram turin a fuih bawk. Mizorama zuk leh hmuam lama danglamna siamtu ni ngei turin duhsakna a hlan a, Tobacco Free Youth Campaign 3.0 chu a hawng a ni.

<><><>

VANGPUI INTAWHKHAWM

Mizoram Legislative Assembly Speaker Pu Lalbiakzama chuan Kelkang Joint YMA leh Kelkang Khawchhuak buatsaih Vangpui Intawhkhawm Vawi 2-na Dilkawn Community Hall-a vawiina buatsaih chu a hmanpui a, Champhai South bialtu MLA Lt. Col. Clement Lalhmingthanga pawhin he hun hi a hmanpui bawk a ni.

Pu Lalbiakzama chuan thu sawiin he Vangpui Intawhkhawm hi Mizo culture tunnunna tha tak a ni a ti a. Pi leh pute nunphung phochhuah a pawimawh thu tarlangin, a phochhuak tur hian khawvel hmasawwna hrang hrang inchim ral tir lovin hman tangkai zawk a tul a ni a ti. Kelkang khaw thalaite chu inelna khawvel sang takah hian Kelkang hming chawikangtu ni turin a chah a, lehkha zirna leh hna zawwnaah theihtawp chah turin a fuih. Hun hlimawm tak hmang turin duhsakna a hlan a, hming tha tak chher chhuak turin duhsakna a hlan bawk a ni.

MLA Lt. Col. Clement Lalhmingthanga chuan thalaite taimakna leh tumruhna nena hna um zel turin a chah a, a bikin ram tana rawngbawlina tha tak Territorial Army hnuaia sipai nih theihnaa tam thei ang ber tling turin a chah a ni.

Vangpui Intawhkhawm Vawi 2-na hi nizan khan variety programme hmangin tan a ni a, vawiin khan chhunzawm niin he hunah hian intihhlimna hun hrang hrang hman a ni bawk.

<><><>

SAITUAL DISTRICT GST

Sawrkar laipuiin September 22 atanga Chhiah thar (GST 2.0) hmang tura thupek a chhuah hnuah Saitual district-ah mipui mamawh bungrua a man tlawma hralh awm bawk mahse, dawrkai zingah GST registration nei an tam loh avangin chhiah hniam hian langsar takin nghawng a neih hrih lo niin hriat a ni.

Hemi chungchangah hian Pu Michael Lalawmpuia Asst Commissioner of State Tax Saitual Zone chuan district thar a nih ang leh an hmalakna a la rei loh avangin tun dinhmunah dawrkai zingah GST registration drive an nei mek zel tih a sawi a. Dawrkai leh contractor GST registration nei awma ngaihte chu hma an lakpui mek tih a sawi.

Pu Michael Lalawmpuia chuan GST registration nei zingah pawh dan in a phut anga hma la tha tawk lo, GST Tax invoice issue loh vang te leh GSTIN signboard tar lote, hun pek chhung pawha hma la lote chu dan hnuaiah pawisa chawitir an nih thu a sawi a. Tin heng bakah hian bungrua cheng 200 chin chung lam hralh a nih chuan danin a phut anga GST invoice issue zel tur a nih thu sumdawngte chu an hrilh tawh a, GST rate hlui atanga rate thar a awm hnua bungraw hralh dan an enchinah hmasawna an hmuh thu a sawi a ni.

Sumdawng, dawrkai leh contractor te chu GST registration nei vek tur leh bungraw lei leh hralh thua an tan pawh a himin lukhawng a nei zawk a, GST registration neih chu channa a ni lo tih hre thar leh turin Saitual district mipuite chu a chah bawk a ni.

<><><>

AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve ah Chanchinthar puan leh a ni ang.

<><><>

PM

Prime Minister Narendra Modia hoin vawiin khan Gujarat-a Ekta nagar-ah National Unity Day hman a ni.

He hunah hian thusawiin khua leh tui zawng zawngte chu ram hmasawna tura inpumkhat tur leh theihtawp chhuah turin a sawm a. Sardar Vallabhai Patel-a piancham vawi 150-na puala National Unity Day lawmnaah hian PM Modia chuan ramchhunga mipui vaibelchhe telin ram inpumkhatna tura thutiam an lak thu sawiin ram inpumkhatna ti chhe thei ngaihdante paih ngam turin mipuite a sawm bawk a ni.

President Draupadi Murmu-i pawhin vawiin khan Sardar Vallabhai Patel pianchampha vawi 150 na pualin New Delhi-a Patel Chowk ah zahna pangpar a dah a. Mipuite National Unity Day chibai a buk nghal a ni.

<><><>

UNION HM

Union Home Minister Amit Shah-a chuan ramin zalenna a neih hnuah ram inzawmkhawmna turin Sardar Patela'n hna ropui tak a thawk a ti. Vawiina Delhi-a Major Dhyan Chand National Stadium-a National Unity Day puala Run for Unity a vailiamnaah he thu hi sawiin Pu Shaha chuan tuna India ram dinhmun chu Sardar Patel-a thawhrah anih thu a sawi a. Ram inpumkhatna turin sulhnu ropui tak a hnutchhiah a ni a ti bawk.

<><><>